

AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Political Party-a lungawi lo chung a hotute rel leh pawl a rinawm loh ai chuan mahni kal duhna ngei a kal chu mi tak tak awm dan a nih thu a sawi.
2. PWD Minister Pu Vanlalhlana'n sawrkar hmalaknaa hmasawnna hnathawh chu tualchung mi ten neitu rilru pua chhawr tangkai a pawimawh thu a sawi.
3. Assam, Keralam leh Puducherry Assembly inthlan chu nimin khan tluang taka zawh a ni.
4. Assembly inthlan la hmabak West Bengal leh Tamil Nadu ah te campaign boruakin a vanglai a thleng chho mek

<><><>

CM

Chief Minister Pu Lalduhoma'n Political Party-a lungawi lo chung a hotute rel leh pawl a rinawm loh ai chuan mahni kal duhna ngei a kal chu mi tak tak awm dan a nih thu a sawi.

He thu hi nizana Dinthar YMA Hall-a MI THAR LAWM LUH RUNPUI a hmanpui na ah sawiin Pu Lalduhoma chuan Chief Minister chuan tunhmaa an lo sawi thin angin, mahni awmna sawn a tul tawh tih an hriat chuan lungawi lo chung a hotute rel leh pawl a rinawm loh ai chuan mahni kal duhna ngei a kal chu mi tak tak awm dan a ni a ti a, AMC inthlan lo awm turah thawhpui tur thar an mamawh lai taka mi 400 chuang thawhpui tur thar an nei chu lawmawm a tih thu a sawi a, ZPM kaihhruai sorkar inngahna mahni chakna leh thil tihtheihna hmachhuan lovin Pathian thlarau thiltihtheihna hmang a Mizoram rorelna a Pathian ram thlentir an duh a ti a, Mizoram rorelna a Pathian ram thlentir tur leh AMC intlan lo awm tura an chak ngei theih nan member thar te chu thawhpui a sawm a ni.

He hunah hian Lok Sabha MP Pu Richard Vanlalhmangaiha leh Bialtu MLA Pu Lalnginglova Hmar, Minister te bakah AMC inthlan lo awm tura Ward XII Candidate Pi C.Vanlalhruaii, leh Ward XIII Candidate Pu Vanlalhruaia te pawhin thu an sawi a ni.

(Hruaia PTC)

<><><>

CAMPAIGN TRAILS

Aizawl Municipal Corporation inthlan lo awm turah Party hrang hrang te ngawrh takin an campaign chhunzawm zel.

ZPM thalaiin Street Campaign an buatsaih-ah Forest Minister Pu Lalthansanga chuan ZPM Sorkar hnuah mipuiten chiah an pek chu dik taka hman a nih avangin mipui an lawm a, Electric bill a hun taka pek a nih avangin lawmman cheng vbch.700 chuang an dawng tih sawiin Road cess an lak pawh dik takin an hmang a, kawngpui tha zawk an siam mek a ti a. AMC ah an Sorkar a nih pawhin an kalphung tur a nih thu a sawi.

MNF Sr Vice President leh Dampa bialtu MLA Dr. R Lalthangliana chuan nimina Zotlang leh Thuampaia MNF Campaign Office a hawnnaah ZPM kaihhruai Sorkar-in a let thawka ration buhfai man a tihsan chu AMC huam chhungah pawh a tuartu chhungkua tam tak an awm a, tui bill, electric bill leh chhiah chi hrang hrang an tihsan chuan nasa takin mipui a nghawng tih sawiin, tawngkam thiam leh sawi mam thiam ringawtin mipui chhiah pek chu a tlem phah lo a, a tuartu leh hre Chiangtu chu mipui an nih thu a sawi a, Aizawl khawpui enkawl turin khawpui hmangaih bertu MNF candidate-te thlangtling turin mipui a sawm a ni.

Mizoram Pradesh Mahila Congress Committee-in Tuma Resort-a Political Training an buatsaih ah MPCC Adviser, Pu Zodintluanga chuan AMC inthlan lo awm turah Aizawl mipuite tan Congress chu an sorkar a ngai a ti a, Ram pumah ZPM sawrkar chuan chhiah nasa taka tipungin AMC ah ZPM an sorkar tir leh a nih chuan chhiah chi hrang hrang an tipung leh dawn tih a sawi bawk.

(Desk)

<><><>

PWD MINISTER

PWD Minister Pu Vanlalhlana'n nimin khan PWD Biate Sub-division office a hawng a, sawrkar hmalakana hmasawna hnathawh chu tualchung mi ten neitu rilru pua chhawr tangkai tum turin a chah.

Minister Pu Vanlalhlana chuan Biate chu khaw fai leh chhuanawm tak a nih thu sawiin, Biatea PWD Sub-Division office hawn a ni chu lawmawm a tih thu a sawi a. SASCI hnuaiah Biate leh a chhehvel khuate tan kawngpui tha siam turin hma lak mek a nih thu tarlangin, vaibelchhe 15 sengin Artahkawn leh Biate inkar kawngpui siamthat a nih dawn thu leh Central Road Infrastructure Fund atanga dawn vaibelchhe 10 sengin Tuipui kawng pawh siamthat a nih tur thu a tarlang a. Transparency International leh NITI Aayog data behchhana CMS India Corruption Study in a hmuhchhuah danin Mizoram chu India rama Lakshadweep dawta eirukna tlem berna state a ni chu lawmawm a tih thu a sawi a. Thenzawl-ah Division thar din a ni tawh a, tunah hian Biate ah Sub-Division din leh a ni bawk a, heng hi khawtlang miten an chhawr tangkaia, neitu rilru pu chungsa sawrkar nen tha taka an thawhho a beisei thu a sawi.

Minister hi Hrangturzo bialtu MLA Pu Lalmuanpuia Punte leh Lunglei West bialtu MLA Pu T. Lalhlimpaia leh sawrkar mi pawimawh ten an tawiam a ni.

(Desk)

<><><>

WEATHER

Indian Metereological Department Director Pu Sudheer Kumar Dwivedi chuan vawiin leh naktukah hian Mizoram hmun thenkhatah ruah, thli leh tek thawk tura hmuhlawk a nih avangin mipuite chu ruah laka tawm hul nan thingkung hnuai leh hmun derthawngah te awm lo turin a chah.

Akashvani Aizawl News zawhna chhangin IMD Aizawl Director chuan Metereological Centre, Aizawl-a an radar atanga a lan danin, niminah Khawzawl-ah ruah millimetre 0.5 a sur a, Mizoram District tinah darkar 1-a kilometre 25 a chakin thli a tleh bawk a ti a, Mamit, Kolasib, Aizawl, Lunglei, Lawngtlai leh Siaha District-ah te chuan ruah tam lutuk lo a sur theih thu leh tek tla a ken tel leh hmel thu a sawi a, hmun thenkhatah chuan darkar 1-a kilometre 30 atanga 40 a chaka thli tleh turin a hmuhlawk bawk a ni.

Pu Sudheer Kumar Dwivedi sawi danin vawiin leh naktukah hian Mamit, Kolasib, Aizawl, leh Saitual District-ah ruah tam vak lo sur turin leh thli, tek leh khawpui bakah darkar 1-a kilometre 30 atanga 40 a chaka thli tleh turin an hmuhlawk a ti a. Ruah, tek leh thli thawh lai hian mipuite chu thingkung hnuai bakah ruah laka chhe mai thei In leh hmun derthawngah te awm lo turin an chah a ni.

<><><>

UNION MINISTER

Mizoram tlawha lo zin, Union Minister of State for Jal Shakti, Department of Water Resources, River Development and Ganga Rejuvenation - Raj Bhushan Choudhary chu Irrigation

and Water Resources Department Minister Pu PC Vanlalruatan a thlenna Lok Bhavan ah a kawm a, Mizoram tana thil pawimawh tak takte leh mamawhte a lo thlen a ni.

Pu PC Vanlalruata chuan Mizoram in ruahtui dawngtha viau mah se a dah khawlnate a neih that loh avang leh tlangram chhengchhe tak a nih avanga tuia harsatna an tawh dante a sawifiah a, tui dah khawlna tha zawk, tuikhuahte hmanga irrigation project an neih theihna tura hma lakpui turin Union Minister hi a ngen a ni.

Mizoramin leihnuai tui verh chhuah a hlawkpui zia sawiin, he project hi tih tawp tumna a awmnia sawi chu chhunzawm leh a nih theihna turin a ngen bawk a ni.

Hei bakah hian cheng vbc 275 hu Mat Valley Integrated Project, Irrigation and Water Resources Departmentin DPR a siam, Bramaputra Board a thawn tawh chu enzui sak a a rangthei ang ber sanction turin a ngen bawk a. Solar pump leh PM KUSUM hmanga tlangram tui pekna rate hniam bik te pawh tih san turin a thlen bawk.

Pu Vanlalruata chuan Mizoram leh tlangram dangte nena hman tangkai tur National Hill Water Security Mission-din a tlangramte tuia harsatna sut kian dan tur ngaihtuah sak turin Union Minister hi a ngen bawk a, Union Minister pawh hian Delhi-ah Secretary-te lo sawipui a tum thu in a chhang a, hun remchangah Mizoram lama a enkawltu Department te nen chiangkhang zawk sawihona hun ruahman a tum thu a lo hrilh bawk a ni.

(DIPR)

<><><>

HPC-D (LF)

Home Minister Pu K. Sapdanga hovin a pisa-ah HPC-D (LF) “Lalhmingthang’s Faction” te rawn haw dan tur ngaihtuahho a ni a,

Ruahman lawk dan chuan tun thla ni 14 hian Sakawrdaiah Mizoram sawrkar leh HPC-D (LF) te hian inremna thuthlung “Memorandum of Settlement” an ziak ang a, a tuk ni 15 ah Mizoram sawrkarin an awm lailawkna tur a ruahmanah an insawn ang. Ni 30-ah CTI-Sesawngah silai tungin an ralthuamte an surrender bawk ang.

Nimina thutkhawmah hian HPC-D (LF) te’n silai an tun dan tur leh hemi in a kaihnawih ruahmanna chi hrang hrang sawiho a ni a, he hunah hian DGP, Home Secretary bakah PHQ, GAD, Law & Judicial, Finance, DIPR, Aizawl bawrhsap bakah Home department leh PHQ hotute an tel a, Sakawrdai SDO (Civil) a tel bawk a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ELECTION

Assam, Keralam leh Puducherry Assembly inthlan chu nimin khan tluang taka zawh a ni a. Assam ah vote zaa 85.40 a tla a. Keralama ah zaa 78.05 tlain Puducherry ah vote zaa 89.83 a tla a ni. Puducherry ah hian Assembly inthlana vote a tlak that ber tum a ni bawk. Keralam ah Assembly bial 140, Assam ah 126 leh Puducherry ah bial 30 ah te vote thlak a ni.

(Newsonair)

<><><>

CAMPAIGN

Assembly inthlan la hmabak West Bengal leh Tamil Nadu ah te campaign boruakin a vanglai a thleng chho mek a. Senior BJP Leader leh Prime Minister Narendra Modia chu nimin khan West Bengal ah a campaign a. Haldia, Asansol leh Suri ah te thu a sawi a. Tun tum inthlan chu West Bengal in a ropuina hmasa a hloh tawh a neihlet lehna tur a ni a ti a. Trinamool Congress Party hotunu leh Chief Minister Mamata Banerjee chuan an party an chak leh ngei dawn tih a sawi a. Minakhan-a a campaign naah he thu hi sawiin BJP ten West Bengal-a voter nuai 90 chuang paih an tum chung pawhin tun inthlanah hian hnehna an chang dawn a ti bawk.

Tamil Nadu ah pahw party hruaitu leh star campaigner ten theihtawp an chhuah mek a. Senior BJP leader leh Union Minister Piyush Goyal, Dr.L.Murugan leh BJP hruaitu Annamalai te chuan NDA thawhpuite tan campaign hna an thawk a. AIADMK leader Edappa Palanisamy, DMK hotu leh Tamil Nadu Chief Minister MK Stalin bakah party hruaitu hrang hrangte voter te thinlung hneh tumin hmun hrang hrangah an campaign a ni.

Assam, Keralam, Poducherry, West Bengal leh Tamil Nadu inthlan result hi May ni 4 ah puan a ni ang.

(Newsonair)

<><><>